

## JUDI

# Judido Vua Amure

E uruvana bu vierafe e Judi e ije fasi ige isoema ije fu Jesudo iviene ijare fasi ige isoe (Make 6:3). Fu Godi fu sanaema fuone ijia no karaunuoema ijadufuo isoekiro vierafe ro fu fieke e ije vua kufui nijasianoejo ijiebe e ije ma vierafevo ije vame kufui buone ije nijasiavo fu fie. Ijadufuo fu fasi ige isoena e ije ma vierafevo ije kuariana kia, E ije vua kufui nijasiavo ije bu Jesudo vua maeje nijasiavo bakino kiae.

### **Judido vua binobino fu isoema ijeja -**

1:1-2 Judi fu bu anadiaema ijene.

1:3-16 Fu e ije vua kufui mena nijasiavo ije bu izege rade isejavaedufuo ijene.

1:17-23 E Godi ma vierafevo ije bu ma vierafevo buone ije ke bio mamekanu redufuo ijene.

1:24-25 Godikiro Jesu Kuraesi aroriavo ijene.

<sup>1</sup> Fasi ige e Judi Jemisido uvia na Jesu Kuraesido imevo ije nare isoe. Na isoena e ije Godi fu kemo ja e fuone reva ijene nijiave. Ro e ije ja Godi Asoe nuvuone ijare oetuamo ro kuke Jesu fu ja samuagiamo. <sup>2</sup> Ro na baname isoega Godi fu maza boeje jone oefiane abena ma rejiakinu ifejiaga ja kafaena oetuanamikinu karinoedufuo.

*Izege Godi fu e ije vua kufui nijasiavo ije kame isekafiadufuo ijene*

<sup>3</sup> Erafano na vierafe naka Jesu Kuraesi izege fu e boeje no karaunuoga no jaena besu karinoevo

ijadufuo vua ije isoe nijiakiro vierafei. Rove iviamna una vua be ije isoe nijiave. Ro vua ijeba na soesoena kuariaga ja griesana Godido vua maeje fu e ije bu fu ma vierafevo ije vajiaema ijadufuo vafaekinu abe mukoreigia samuadufuo.<sup>4</sup> E bino Godi naebe ma vierafevo ije bu mauike nuriete e ije ja afuina kariva ijia jaena biezinami karikuae vuae. Bu vierafe buka Godido vua maeje fu e boeje oetuakinu ise buone giana aremo ije dabe dakudena una ni be rekuae vierafe. Bu kuae vame fudaenamikinu vame isema renoejo ije Godi fube no kena isekafuokono kuae. Ro kuke bu Jesu Kuraesi e Ireobo nuvuone fu fuosukua no samuaguomo ije buka ijuoneve. Ro e ije Godido vua vierafera kuaevi ijiebe isuibe e ije bu ijiege isema renoejo ije Godi fu izege kena isekafiadufuo fu kuaema ije bune buki akae ijia isoe.

<sup>5</sup> Ro vua ije jane vierafei rove na una ja nijasaga ja vierafeke. Ni izege E Ireobo ije fu e fuone Isureroko ije aesakae Ijifiti ijia karauniaema ije vierafevo. Fu karauniae rove rade e ije bu naebe fu ma vierafovoga fuka kame isekafiae.<sup>6</sup> Ro kuke ni anera ije vierafevo. Budua bu Godire daro vajiae rove buka una Godido daro ije asikuae vierafe. Ijadufuo Godi fu seni ije turasedufuo baki ijia kena anera ije kiriamma kame are titutema ijia uniae. Ro rade maza ije fu una ruomo ije fu bu kame isekafiake.<sup>7</sup> Ro kuke ni sidove Sodomekiro Gomora ro are isesina gue bu irifo ijia kariva bu izege reva ije vierafevo. E ije bu anera ije bu reva ijiege rena buka naebe Godi irinae. Ro buka una barubara bue fudaenamikinu vame ka ma ije

rei. Ijadufuo miane fu saove ijia arina sidove ije nae. Fu ijiege naenoga e boeje bu ijia giana vierafero bu iserekuva budua bu rade miane ijia ijiege naona isejavaekiro bu ijiege vierafeke.

<sup>8</sup> Ijadufuo vame besu ijiege e ije nuriete jone vuaeva ije bu naka naokinu vame ise ije renava jae buone kame arafiriave. Bu ijiege renoekinu Godido daro maeje buka ijuonena una vua ise bino Godido anera ijiebuo kuaenoeve.

<sup>9</sup> Rove anera uguakeki Maekero fu naebe ijiege rei. Fu kavene ise Setaniki Mosido vajaе surive ije abekuae bue madinami. Rove fu naebe itire fuone ijia vua ise bino kavene ise Setani kuarae. Ro fume kuae, Na vierafe Godi fuka a dabe isekafakono kuae.

<sup>10</sup> Ro e ije bu vua ije naebe mukoreigia fiена vierafevo ije buka una ve ijadufuo vua ise kuaево. Ro vame buone bu kevo ije buka fanuve bu naebe ire bino vierafevo ijiege renoevo. Ijadufuo bu vame ijiege renoevo ijia buka vajaе buone kame arafirianoeve. <sup>11</sup> Ijadufuo e ije isekijo! Buka vame ise ije e Keini fu kema bu ijia nuveve. Buka moni uruvana vierafevo ijadufuo bune e Berame e ije fu Godido vua ije ijuonena moni abekiro ireobo vierafema bu ijia nuvena vame ise ije renoeve. Ro kuke buka e Kora fu rema ijiege renava Godina bijaeve. Ijadufuo Godi fuka izegе fu e Kora dabe isekafaema fu rade bu kame ijiege isekafiakе. <sup>12</sup> Ja Godido are ijia besu afuina oetuanamikinu ire ivo bu ijia jaena ire ivo ije buka vame ise binobino reko jaka jaediame. Ro buka buosukua ire uruvana ikuae vierafevo. Ijadufuo buje buka ire amite ije fu majaufi ijare

abena vako ve ije fu naebe damo bu ijieki. Ro kuke buka ine ije fu a kanama areme naebe maza fuone ma ijia una kiraro fuka saeremo igeiki. <sup>13</sup> Ro ise buone ije buka ire do ije fu firana kadure ro do sabae ije irifo ijia arena vako ijieki. Ro kuke buka ire zuvi ije bu naebe are besu ire ro bume ijia oenoevo igeiki. Ro e ijieki ijiebuo are ije ka ma titutema bu maza boeje ijia karivadufuo ije fune Godire buefuo amaerijiae.

<sup>14</sup> Ro e ijiebuo vua ije fune e Adamudo uifari be e Inoki kuavo ijare ude buesina kuae. Ro vua ije fu ijiege kuae,

Gafia gafo! E Ireobo fuka anera fuone akae ka ma uruvana kaenamia fuina ruome. <sup>15</sup> Fu kaenamiana e boeje kena mazie giakiro ruome. Fu Godido e ani ije bu vame ise fu naebe oemaedufuo ijia renoevo ije kame isekafiakiro ruome. Ro kuke fu e ije bu vua kuriae kuriaeki Godisina kuaevu ije kame isekafiakiro ruome.

<sup>16</sup> E ije buka vua kame e bino namiakinu zie vua ije maza boeje kuaevu. Ro kuke buka aroekarana vame ise ije bu vierafevo ije nuvediavo. Ro maza bino buka e gue biesiriana ire buone maeje kekuae kame soesoevo.

### *Vua nijasiana ijuriaga bu ijia nuvena karidufuo ijene*

<sup>17</sup> Ro kairafano vua ije e Afasero e ije bu E Ireobo Jesu Kuraesido imenoejo bu kuariavo ije mukoreigia vierafevo. <sup>18</sup> Bu kuariana kia, Maza radekuma ije ruakuma e buka usiaena vame jone maeje ja kenoevo ije kame varaemena kisiadufuo. Areme bu uri vame buone ise ije Godi fu

naebe oemaremo ije renoeke. <sup>19</sup> Ro e ijieki ije bu Godido Kavene ije bu naebe abei. Ijadufuo buka e kame ataga bu buone binobino karinoeke. Ro kuke buka uri ire ije vajaema buone bu oemadiadufuo bu vierafevo ije renoeke. <sup>20</sup> Ro kairafano jaeje jade vame ijiege renoevo. Ro nika griesana ifejanamiga jone ja ma vierafevo ije fuka ireobo refo. Ro nika maza boeje Kavene Akae ijadufuo daro ijia baname isoenoefo. <sup>21</sup> Ro maza boeje nika Godi izege fu e oetuamo ijene dabe jone nijaenamifo. Ja ijiege renoekuva maza ije Jesu Kuraesi fu una ruomo ijia fu una ve ja marejiana ifejiaga ja ma karivako ije abeke.

<sup>22</sup> Ro kuke nika e ije bu Godi ma vieraferkuae zazaevu ije buone oefiane abekinu oetuana ifejiaga bu una Godi gikikimana ma vieraferfo. <sup>23</sup> Ro ni e ije gue Godi fu rade ise ije bu renoevo ijadufuo kame miane ije naeno ije isekafiakuveno ije ifejiaga faradia turana una vame maeje ijia uniafo. Ro kuke ni e ije bu vame ise ijare bu kame toenamiaema ije oetuana karauniafo. Ro ja bu ifejiakuva ni mukoreigia jone samuanamikiro jade bu reva ijiege mamona ise bino renoevo.

### *Baname isoena Godido oemarevo ijene*

<sup>24</sup> Roga noka Godi e ije fu no karaunuema ijadufuo oemarefo. Ro ni baname isoega Godi fu ja mukoreigia samuagiaga jone ja ma vierafervo ije jabe mamona ari kaniake. Ro fu kaenamiaga ja nidua fuone sanaema ijia maturaena karike. <sup>25</sup> Ro Godi fuosukua fuka Godi ma ro kuke fure Jesu Kuraesido duvado ijia no karaunue. Ijadufuo roga no Jesu Kuraesido duvado ijia maza

boeje Godi ijene dabe aroekinu oemarejafo. No vierafe e buka sanaema fuone ijiakiro daro ro ire boeje samuagiamo ijadufuo fu dabe aroekinu kari vake. Buka izege e bu iko zinume ijia fu dabe aroeva ijiege bu iviama ro maza rade ijiege dabe aroekinu vake. Mare!

**GODIDO VUA MAEJE**  
**Genesis, Exodus, Numbers, Joshua, Ruth, Nehemiah,**  
**Jonah, and the New Testament in the Barai language**  
**of Papua New Guinea**  
**Sampela hap Buk Baibel long tokples Barai long**  
**Niugini**

copyright © 1994, 2006 Wycliffe Bible Translators, Inc.

Language: Barai

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

---

PDF generated using Haiola and XeLaTeX on 11 Nov 2022 from source files  
dated 9 Oct 2020  
c330b06f-2974-56b2-aa23-32e3eed78329